


民國叢書

第三編

• 82 •



心太平室集

張一麐

民國叢書

第三編

· 82 ·

綜合類

4167

貝

一



書

麻三第

58

圖書創大

張一麐著

心太平室集

本書據1947年線裝本影印

序

嘗謂魯仲連齊東一野人耳其於秦非有桑梓之親也於秦王非有君臣之義也席戰國處士縱橫之議矢不帝秦舊史美之今夫仲連亦知秦莫予毒耳使齊欲帝者仲連且奈何其蹈海與否未可知也吾老友張子古之狷人也乙丙之際衆佞盈廷君方官樞要參密勿於當軸且有布衣昆季之好一旦決然去之死生禍福非所計吾以爲賢於仲連遠甚其後君里居遭國家多難諸將帥爭權奪利自相殘賊者十餘年東人猾夏一再內侵者七年於茲往者君於諸將亦旣垂涕泣而道之矣今歲八月東人再闕君感於童子軍致身前敵有死綏者慨然要約諸海內老人樹立一幟以其餘年爲國家效命當道聞而尼之議雖不行君之志事蓋有迥異乎庸衆者又非乙丙之際矚然不污者比也於時君之門人方刊行君全集屬序於余君之學海內所共知余感於君之生平犖犖大節乃僅以斯集爲不朽之業而使後之人得因斯集以窺君之生平則可欣也然不朽者豈僅斯集也歟中華民國二

十六年十月弟韓國鈞

光緒壬午秋先師仁和許恭愼公星叔諱庚身南海譚公叔裕諱宗浚奉命
典試江南兩公崇尙經術壹甄拔樸學博文經明行修之人特以學詩爲二
南命題追琢其章譽髦斯士於時蘇州袁部郎寶璜曹文愨福元金壇馮撫
軍煦俱獲菁莪凡械之選余亦濫躋其列而吳縣張君仲仁甫十六齡爲許
譚二公所激賞榜發誤中副車蘇父老搢紳且喜且惜越三年乙酉君赴京
兆秋試賦鹿鳴歸許公大悅揄揚無斂於是君名滿京師而余始識君於春
明團拜時厥後君敷歷中外舉經濟特科洊任弼德院參議嘗一佐項城袁
大軍機世凱幕無何國步斯頻項城以總統枋國政赫赫厥聲其猷如執熱
不可濯貪人敗類巧言如流謂有命旣集宜保茲天子項城惑之遂稱受命
改元維時君方任機要局長曰殆矣不知其玷也是用大諫當謹爾侯度毋
淪胥以亡詎意發笥逝梁誦言如醉迨夫顛沛之揭始悔正直不與而亂不
沮方事之殷識者以君究彼謫逢彼怒且爲將恐將懼惴惴小心君坦然曰

吾固不畏彊禦也遂出公府長教育嗚呼抑詩有言其維愚人覆謂我僭又
曰聽用我謀庶無大悔項城能用君而不能聽君之謀非所謂回適其德未
知臧否者耶洎項城卒君隱居里門偶因民生利害發憤一言輒不得當遂
益韜晦守白圭戒考槃之碩人永矢弗告白駒之嘉客金玉爾音豈已焉哉
匪舌是瘁惟躬是瘁也士君子際天之方蹶無回天之力而不能不與天爭
痛民卒流亡無救民之權而不得不爲民救然而南箕翁舌北斗挹漿閭閻
杼柚其空矣睠言顧之怒焉如擣謂之何哉數十年來師門殂逝而後若袁
若曹若馮諸同年先後云亡而我兩人者亦曰既耄矣顧瞻四方中心如噎
履冰集木日邁月征惟小宛之詩可以處世而進德顧山有嘉卉谷有幽芳
無罪無辜廢爲殘賊可無以拯之乎然則躬丁板蕩心攪民勞曷嘗忘惠此
中國哉我相此邦無不潰止有心人讀變雅末篇不禁涕零如雨也歲次丁
丑十一月爲君七秩攬揆之辰同人等哀集君所著心太平室詩文鈔及古
紅梅閣筆記蓮幕集數種將壽諸梓徵序於余余曰善哉天保詩頌九如曰

如松柏之茂無不爾或承君歲寒松柏宜乎降福孔固俾壽而臧爰序簡端
方諸吉甫作誦山甫慰心庶無負先師學詩之訓乎風雨如晦雞鳴不已老
成舊止殷監在茲凡百君子讀君之文慕君之節必有仰高山而景行行止
者已年愚弟太倉唐文治謹序

張仲仁先生傳

先生名一鏐仲仁其字初字崢角號公紱別署曰民傭曰大園居士江蘇吳縣人父是彝清光緒庚辰進士官直隸正定縣知縣母氏吳以清同治六年公元一八六七年生先生兄弟三人兄一夔字寅皋先生其次也幼穎異被譽爲聖童年十二入縣學爲諸生光緒壬午年十六中江南鄉試副貢乙酉年十九中順天鄉試舉人文名溢吳下嘗自課弟雲搏一鵬讀歲癸巳一鵬亦中式江南鄉試戊戌政變兄弟相偕就蘇城創蘇學會倡新教育以應之辛丑壬寅間先生受四川學政吳蔚若郁生聘入蜀襄試癸卯年三十七江蘇巡撫恩壽陝西學政沈衛均以先生名保薦應試經濟特科試卷爲張之洞激賞置第一揭彌封則赫然先生名也主者以大魁宜出翰林院乃拔袁嘉穀爲首而次先生焉甲午以後先生三度計偕俱以所親襄事試闈至則格於例迴避嗒然返至是分省直隸授天津河防同知

袁世凱方爲北洋大臣兼直隸總督震先生名欲羅致之始先生分省湖北

世凱與之洞爭之力乃改今省入幕辦文案爲文工且敏他人數百言不能盡以數十言了之昏夜世凱索幕客不得獨先生危坐屬草十餘稿立就自是參機密得署同知同知兼理輕微民刑事一日拘小竊至稱苦飢寒耳先生惻然給銀數圓令小負販自活數日又拘至問何不改行稱所賜僅小負販一次資盡矣先生謂可原也薄責之給銀如前數不數日又至則伏地不語先生命送之獄忽哭呼母復訊則云小人死不足惜母年過七十一日不歸母一日餓奈何事聞於後堂吳太夫人呼先生進倍予銀而仍釋之其人卒改行

丁未世凱被朝命入參憲政先生偕赴京軍機批擬益資倚重一時籌辦自治設各省諮議局凡有關憲政詔諭章制文電咸出先生手戊申己酉間世凱被擠還汨上先生亦移家南下就蘇城籌建圖書館築公園友好之在浙者迎游西湖遂入浙撫增韞幕辛亥春返蘇養疴十月而武昌起義清廷起世凱爲湖廣總督星夜電先生入京時各省紛紛響應民軍人心極度激奮

而民軍力弱實甚南通張季直嘗武進趙竹君鳳昌輩憂之長日集上海趙惜陰堂密商以爲惟清廷遜位則國難可以立免惟世凱能說清廷顧誰說世凱者舍先生將奚屬函電往返終使世凱意向民軍清后下詔遜位數千年帝制一日而民國此旋乾轉坤大業以唾手致之在南謫鳳昌輩在北日眊於世凱前以底於成則惟先生一人

江蘇獨立先生應蘇督程雪樓德全約一度歸任民政司長惟世凱終不能釋先生不久復北受任總統府祕書兼政事堂機要局長無何世凱欲稱帝左右承旨勸進先生入諫反復陳利害政事堂會議籌備大典獨起立直斥纔發言武人某舉鎗怒目之國務卿徐世昌遽起牽先生衣曰仲仁隨我來先生色然出立辭機要局長夜有人投彈私邸死馬一人咸爲先生危蔡鐸之易姓名出亡也瀕行貽盆桂二盆者朋也桂者歸也隱風以朋友偕歸之意而先生夷然

先生之辭機要局長也世凱仍授教育總長職以羈縻之時爲四年十月在

任重視社會教育捐廉俸特創注音字母傳習所不久引去走日本雲南護國軍起各省先後揭幟獨立世凱懼急自廢帝制至是悟先生忠鯁電歸慚謝其廢帝制文告蓋猶先生手筆也既而世凱病死先生益無意仕進迨馮國璋以副總統代理大總統職嘗一任總統府祕書長非其意也維時南北兩國會兩政府對峙國事益俶擾先生則唱統一唱和平繼且唱民治謂非統一不足以建國非和平無以安民生然非民治又無以立其本也八年二月上海開南北和平會議先生被推和平期成會副會長遂至上海憤於和平中輟統一莫望乃爲文以評其友徐佛蘇西南自治與和平一書其文略曰代表撤回和平中梗吾輩向者無窮之希望已付東流計自上年兩方代表開議以後所可稱爲讓步者不過主戰之段合肥變爲局部議和之馮河間而止然不生不滅不戰不和之局雖有善者無以解決甲仆則乙興丙唯則丁否以外力之撓逼與夫國力之困窮其能長此終古耶日復一日元氣凋喪火盡油乾非與國同休不止又曰自漢以來或數年或數十年或二三

百年有不革命者乎此其故安在哉又曰帝制萌芽在民國四年之初各省將軍紛紛添募軍隊一日余謂朱君啓鈴周君自齊曰藩鎮之勢已成此後中央命令恐不能行於地方兩君然之而無如何果也項城沒而督軍團興南京會議徐州會議天津會議風起雲湧不可爬梳昔也川滇之役今也奉直之爭苦我人民危及邦國又曰共和原理必由民治真自治便是國民有自覺之智識自動之能力言自治之極點必標其名爲民治夫武力之不能統一由當事者不知民治之義遂無自覺之心至於今則向所恃爲雷霆萬鈞之武力無不力盡精疲途窮日暮宜若可以幡然變計咸與維新而雙方皆以習與性成莫肯推誠相見又曰顧亭林謂用天下之私以成一人之公而天下治若夫今日自治之說則用人民之私以成天下之公然非有權力者犧牲小我以全大我其道末由文末曰僕性疏狂不樂羈繫人事牽率每難自由清光緒癸卯以後在北洋幕府者七八年藉讀未見之書略明當世之故辛亥變革偃處里中以地方秩序之不可坐觀府主情誼之不能過卻

參與文牘無役不從蒿目時艱彌增隱痛歎吾謀之不用遂浩然而思歸項城既殂亟思退隱乃塵心未淨祠祿虛餐國危而無以扶持民困而未由拯救自上年十月十日以後閉門思過久已與政治絕緣今因徐君之文而又嘵嘵是亦不可以已乎顧嘗思之人之所以異於禽獸者惟人偶之仁與互助之義耳世有保我民國善我亞洲以撲滅全世界之東方導火線者乎雖礫余其無悔文長數千言窮一日之力以成而不加點時爲民國八年九月所謂上年十月十日則新國會舉徐世昌爲大總統國璋祺瑞同時下野之日也先生用心蓋灼然可見已

大局日惡化然先生和平統一之信念不改會湘軍入鄂十年八月兩湖巡閱使吳佩孚兵下岳州先生夙見重於佩孚乃復奔走游說九月以與蔣方震張紹曾輩合力由紹曾發起廬山國是會議電徵各省意見期實現和平與統一先生率先電應佩孚等以與先生有成約電表同意終以若干方面各持異議而無形消滅

自是先生杜門不復談國政然遇地方重要事故仍挺身代表人民與權閥奮鬪例如齊盧之戰江浙民衆銜之次骨而無能爲先生集兩省人士奔走京杭間垂涕阻雙方出兵嘗說盧永祥不見聽至於下跪及齊變元敗則又奔走雙方爲之畫界駐兵俾相安焉奉軍南下江蘇地方受蹂躪至苦先生函電申訴無效則犯顏面折以至聲色俱厲維時蘇人士如上海沈恩孚無錫錢基厚武進錢以振鎮江冷適宿遷黃以霖輩皆有志於扶持鄉邦正氣領袖爲誰則先生是也如是者蓋不一其時不一其事以迄於抗日戰起先生以積勞故精力漸耗小洩見血醫言病在腎須長期休養鄉居仍與其友李印泉根源弟一鵬爲地方謀公益百廢咸舉弗一日自逸蘇城之西有地曰善人橋土沃而民風滋厚先生就其地興教育改良農事爲一般鄉村示範自先生居鄉鄉人若藐諸孤之得母地方官吏若立之監咸自濯磨以競於善先生則恂恂焉休休焉若不及也東吳大學以法律博士學位贈先生彰榮譽焉上海一二八民衆抗日先生偕蘇人士撫傷兵救難民至八一

三之戰而規模更大先後設醫院二十四救治傷兵至五六萬收容難民且十餘萬爲詩文大呼殺敵救國更倡議組老子軍以作民氣迨大場撤兵蘇城陷盛傳先生被迫投井殉海內外震悼而不知先生以民衆之擁護早易僧服隱於穹窿寺不降志不辱身以自脫於難

民國初年蘇人士嘗謀擁先生長省議會以與人競先生弗以爲意也至是敵愾益熾政府設國民參政會以一國人心力先生自二十七年第一屆當選爲參政員以迄於三十二年第三屆先生在參政員中齒最長非病不缺席每次代表全會致詞一本至誠發爲直言切中時弊不隨不激聞者動容三十年十一月第二屆第二次大會張表方瀾偕先生等提出實現民主以加強抗戰力量樹立建國基礎案列辦法十條請禁以國庫支給黨費禁歧視無黨或異黨禁任何黨派在學校推行黨務禁一切非法特殊處置壹皆人人所欲言而不肯且不敢言者案雖爲主席團留中然如召開國民大會制定憲法保障人民身體言論自由諸條獲通過於全會深入人心著爲國